

# Fiug e flomma per la musica

La Scola da musica Surselva e sia formaziun Brassorama

DAD AUGUSTIN BEELI / ANR

■ **La scena da musica dalla Surselva seprofilescha adina puspei sur sia regiun ora cun prestaziuns. Quei ei stau il cass dacuort al final dalla concorrenza «Top junior musique» a Crans Montana.** Enteifer la Regiun Surselva ha la scola da musica in'incumbensa ch'ei definida suandontamein: «Ella survescha agl interess dallas vischnauncas e porscha ad affons e carschi ina vasta elecziun musicala. Ella porscha buca mo musica, mo bein intermediaria il plascher ed il tschaffen da cantar e da sunar.» La purschida cumpeggia cuors fundamentals, instruiziun da gruppa, da singuls ed ensembles. Naven dil bustab a sco accordion tochen tier x sco xilofon san scolaras e scolaras emperder varga 20 instruments. Il plascher d'in ni plirs vegn buca mo ellas lecziuns singulas. Sunar ella gruppa promovia cunzun il tschaffen. Era participaziun a concorrenzas san far effect. Sco quella dil Club Lions Surselva, ni era projects da musicals, concerts e produziuns. Per effects procura era la formaziun da stuors Brassorama.

## Meinsvart drovi in stausch

Il «project» Brassorama dalla Scola da musica Surselva ei ina historia da success. Avon treis onns ha *Hanspeter Bircher* da Cuera fundau quella sin iniziativa da *Claudio Simonet*. Las musicas da giuvenils Cadi ed Aspermont Sagogn havevan gest calau e caschunau ina ruosa. Quei mument ha Simonet, sustenius da giuvenils musicants, intimau Bircher da vegnir activs e d'organisar la cuntinuitad. El ha seschau perschader. Igl intent ei staus definitius, numnada meinsvart quel da promover las scolaras ed ils scolaras dils instruments da stuors. Il singul drova meinsvart in stausch dalla gruppa. Quei ei semussau la primavera 2018. Sur Anceinza ein 12 affons e giuvenils dalla Surselva viagiari in Hollanda nua ch'els ein separticipai al 13avel Fe-



Ils giuvenils ch'ei viagiari a Crans Montana ein returnai cugl emper plaz dalla concorrenza «Top Junior Musique».

MAD

stival internaziunal da musicas giuvenils. L'experiencia in ina tiara jastra, in in ambient cun 6000 affons e giuvenils da tut il mund, ha dau in stausch.

Cu el ha proponiu igl unviern vargau da separticipar alla concorrenza nazionala «Top junior musique» ha Bircher buca stuiu far gronds sforzs per motivar. Igl ei ina concorrenza per giuvenils ellas spartas musica populara, cant da chor, musica instrumentala ed accordion. Ella sparta dallas musicas instrumentalas ei Brassorama sequalificada pil final. Ella sparta dil cant ha igl ensemble Picant, ina formaziun da cantaduras dalla Surselva, gudignau la preselecziun. Ell'ei viagiada cun Brassorama al final a Crans Montana. Igl ensemble da stuors ei returnaus sco victur. Pil dirigent e menader Bircher eis ei stau in gi special. Ses 20 musicants e musicantas han fatg ad el in grondius schenghetg. Ils 21 da settember ha il pedagog da musica festivau il 53avel gi da naschientscha ed igl en-

semble ha gudignau la concorrenza «Top junior musique».

## Diversitad garantida

Per *Clau Scherrer*, il menader dalla Scola da musica Surselva, ei Brassorama in cass da cletg. Buca mo per la scola da musica, era pil District da musica Surselva. Brassorama ei pils giuvenils ina plattafuorma ideala. Scherrer accentuescha che quella formaziun adempleschi quei ch'ina scola da musica sappi giavischar.

La Scola da musica Surselva porscha cun Brassorama in ensemble per instruments da stuors. Cugl orchester a corda dat ei aunc ina formaziun pils instruments classicis, e culs chors d'affons e giuvenils vitier aunc ina sparta pil cant. Las diversas bands che porschan pusseivladads els secturs pop e rock completeschan l'entira sparta. Brassorama seigi negina concorrenza tier autras musicas giuvenils, puntuescha Scherrer. *Remo Derungs*, il dirigent dalla Musica giuvenila Lumne-

zia, garantiescha quei, el s'engascha cun cor ed olma en omisdus formaziuns e sco scolast per instruments da stuors.

Era sch'il num lai parer quei ei Brassorama buca ina tipica formaziun da brass. «Igl ei in ensemble slargau per sunadurs d'instruments da stuors», declara Bircher. Denton era buca ina fanfara e buca ina harmonia. Ils giuvenils che separticipeschan a Brassorama vegnan dall'entira Surselva. Ils affons e giuvenils s'entaupan diesch gadas d'ora in semester, mintgamai la dumengia sera allas 17.30 a Glion. Igl urari ei adattaus allas colligiaziuns cul traffic public.

Egl anteriur luvratori dalla Repower ha la scola da musica saviu endrizzar in local spazius ed adattau per gruppas. Per las societads da musica dalla Surselva ein Brassorama e tschellas formaziuns da gronda valeta. Talas garantieschan il futur dalla tradiziun musicala en Surselva.

## Sedrun Mustér Turissem: Negina carta d'unviern gratuita pli

■ (anr/hh) La suprastanza da Sedrun Mustér Turissem ha decidiu d'abolir la carta da hosps gratuita pigl unviern. Sco quei ch'ella scriva en ina comunicaziun vul ella tschentar in accent cun ina partenza nova dalla carta da hosps gratuita per la stad. Quella duei vegnir en funcziun l'emprema ga igl onn vegnent. «El center duei la purschida turistica da stad star. En quei connex duein las prestaziuns inclusiv star a disposiziun ad aschi bia gliued sco pusseivel», scriva la suprastanza. La finamira da quella purschida ei da saver augmentar il diember da pernottaziuns la stad. Cheutras duei vegnir scaffiu ina plivalur turistica ed ina megliera occupaziun dall'infrastructura. Davart il cuntegn dalla purschida, respectivamein dalla carta da hosps per la stad, vul Sedrun Mustér Turissem orientar pli tard. La carta da hosps da questa stad ei valeivla aunc entochen la fin d'october. Hosps da vacanzas che stantan ella regiun per silmeins ina notg obtegnan ina carta cun ina vasta purschida gratuita. Denter auter san els far diever gratuit dalla Viafier Matterhorn Gottard da Mustér entochen sil Pass Alpsu, la pendiculara da Mustér si Caischavedra e da Sedrun sil Cuolm da Vi sco era la pendiculara dall'Alpsu sil Schneehüenerstock. Leutier vegnan reduciuns da prezis per ulteriura purschida.



Scena ord il film «Amur senza fin».

MAD

## «Amur senza fin» el Cinema d'uual

■ (anr/hh) Mesjamna proxima muossa il Cinema d'uual el'Academia Vivian a Medel/Stagias il film romontsch «Amur senza fin», ina producciun digl onn 2018. Rumpeivel e custeivel: Suentar 20 onns ei la lètg da Mona e Gieri sedurmentada. In spirai da cusseglis nunortodox dil plevon emprovan els da reactivar lur lètg. Gieri, gie schizun igl entir vitg, s'agiteschan. Il film vegn mussau cun suttellets tudestgs. La sera da film vegn organisada dil Center sursilvan d'agricultura.

Mesjamna, ils 9 d'october 2019 allas 20.00. Naven dallas 19.00 bar d'uual e grill. Shuttlebus (5 francs per viadi) naven da Mustér/Salaplauna, Curaglia, Stagias sin preannunzia sin info@agricultura.ch ni 081 936 48 00. Partenza allas 19.15. Pil film vegn rimnau ina collecta. En cass da malaura vegn il film mussau el Center sursilvan d'agricultura a Mustér/Salaplauna.

reclama

**Montag bis Freitag**  
ab 18 Uhr

**Regionaler informiert mit**  
**TV Südostschweiz**

Das Nachrichtenmagazin  
«SO informiert» berichtet  
topaktuell aus Ihrer Region.

# SpongeBob e la metta da fein

In curtgin a Rueun plein figuras e fantasia

■ (anr/abc) **Tgi che va a spass tras il vitg sut da Rueun fa stem da figuras che salidan ord in curtgin. Las creaziuns scurrilas, fatgas cun dun artistic, fan Lilian Schlosser e siu um sezs cun different material.** Ina gronda figura dil SpongeBob entaup'ins dapi questa stad a Rueun en in curtgin. Igl umet mellen culla gronda bucca ed ils egl marcants s'auda tier ina seria da films animai digl American Stephen Hillenburg. Avon 20 onns ha quella seria entschiet a sederasar ell'Europa e daferton ei il SpongeBob ina figura da cult. Igl umet culla bucca largia ei nuot au-

ter ch'ina spungia che sa tschintschar. Quella viva en in liug sutmarin cul num «Bikini Bottom». SpongeBob lavura – aschia sco igl ei usitau ell'America – en in'ustria da fastfood en quei marcau sil funs dalla mar. Cheu dat ei da tuttas sorts aventuras e schabets paradoxs cun figuras nuota meins scurrilas.

El quartier da Piadras a Rueun, sper la casa dalla famiglia Schlosser, ha ei in grond SpongeBob. Igl ei in da numerus objects ch'ei da veser el curtgin. *Lilian Schlosser* e siu um han grond dun artistic ed inschign artisanal. Els han fatg sezs la

figura da cult cul tgau quader mellen. Era autras figuras da fantasia han els creau cun different material. Il stil regorda a quel dil renomau artist permier H. R. Giger da Cuera. Culla differenza ch'ìls Schlossers integreschan dapli la natira en lur ovras. Per exempel san ins admirar en lur iert creativ ina petga fontauna fetg speciala. Ins vesa tschun cuppas ni scadialas ch'ei cavigliadas ina sur l'autra e zugliadas cun umbrivals ni teilas. L'entira petga ei tschentada en in begl rodond. L'entira sculptura ei dira sco crap. Avon che metter las scadialas sur las cuppas han

ils creaders bugnau ellas en betun liquid e schau schigiar. Colligiada cul bischel e pumpa eis ei uss in object d'art che savess attrer l'attenziun en in parc d'in marcau. Per utschals ed animals pigns eis ei in bogn beinvegniu el curtgin privat. Igl object survescha suletamein al plascher dalla famiglia. Culla medema tecnica creescha Lilian Schlosser era gruppas da nanins plein expressiun. Vinavon dat ina figura stgira en egl. Ei para ch'ei seigi la metta da fein che cumpara als passants ch'admiran il curtgin da fantasia el quartier da Piadras a Rueun.



Il SpongeBob plai cunzun als affons.



Quella figura stgira carmala buca gest da s'avischinar.

FOTOS A. BEELI